

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 शुक्रवार

दिनांक 27.09.2024

प्रमुख समाचार –

- 1– केंद्र सरकार ह महंगाई भत्ता म फेर बदल करके न्यूनतम वेतन दर म बढ़वार करे के करीन हे घोसना–नवा वेतन दर पहिली अक्टूबर ले होही लागू।
- 2– केंद्रीय पर्यटन मंत्रालय ह पर्यटन बर छत्तीसगढ़ के ढूढमारस अउ चित्रकोट ल सर्व श्रेष्ठ गांव के रूप म चुने हे।
- 3– केंद्रीय जल सक्ति अउ स्वच्छता मंत्री काली अट्ठाईस सितंबर के राजनांदगांव जिला म पर्यावरण संरक्षण ल लेके करे जात काम के करहीं अवलोकन।

श्रमिक वेतन–दर

केंद्र सरकार ह महंगाई भत्ता म फेर बदल करके न्यूनतम वेतन दर म बढ़वार करे के घोसना करीन हे। नवा वेतन दर पहिली अक्टूबर ले लागू होही। नवा दर अकुसल, अर्धकुसल, कुसल अउ अत्यधिक कुसल स्तर के आधार म बांटे गेहे। अकुसल कामगार मन बर न्यूनतम भुगतान रासि सात सौ तिरासी रूपिया प्रतिदिन होही। अर्धकुसल कामगार मन बर पारिश्रमिक आठ सौ अड़सठ रूपिया तय करे गेहे अउ कुसल मन बर नौ सौ चौब्वन रूपिया अउ अत्यधिक कुसल कामगार मन बर न्यूनतम वेतन एक हजार पैतीस रूपिया प्रतिदिन तय करे गेहे।

विश्व पर्यटन दिवस

भारत सरकार के पर्यटन मंत्रालय ह विश्व पर्यटन दिवस के मउका म सर्वश्रेष्ठ पर्यटन ग्राम प्रतियोगिता के विजेता मनके घोसना करे हे, जेमा साहसिक पर्यटन बर छत्तीसगढ़ के दूढमारस ल अउ सामुदाय आधारित पर्यटन बर चित्रकोट ल सर्वश्रेष्ठ गांव के रूप म चुने गेहे।

लोगन ल एक-दूसर ले जोड़े राखे अउ अर्थव्यवस्था ल मजबूत करे म पर्यटन के महत्ता ल बताय बर हर बछर सत्ताईस सितंबर के ए दिवस मनाय जात हे। एसो के बिसय हरय “पर्यटन अउ सांति”।

विश्व पर्यटन दिवस म आज पर्यटन मंत्रालय ह पर्यटन मित्र अउ पर्यटन दीदी नाव के एक राष्ट्रीय दायित्व पूर्ण पर्यटन पहल सुरू करे हे। मंत्रालय ह किहीन हे कि माईलोगिन अउ युवा मनके परसिक्षण म बिसेस धियान दे जावत हे। एखर बाद डिजीटल साक्षरता अउ डिजीटल उपकरण म घलो बिसेस रूप ले प्रसिक्षित करे जात हे, जेखर ले ओमन पर्यटन मित्र बन सकय।

ऐति, प्रदेश के मुख्यमंत्री विष्णुदेव साय विश्व पर्यटन दिवस के मउका म रईपुर म सेंट्रल इंडिया कनेक्ट मार्केट प्लेस दू हजार चौबीस के सुभारंभ करीन।

मुख्यमंत्री ह ए मउका म प्रदेशवासी मन ल बधई अउ सुभकामना दीन हे। ओमन किहीन कि छत्तीसगढ़ के पर्यटन अउ संस्कृति सुधर हवय। छत्तीसगढ़ के पौराणिक महत्व अउ ओखर सुघरई ल देस-दुनिया म बताय बर राज्य सरकार परयास करत हे।

केंद्रीय मंत्री-स्वच्छता अभियान

केंद्रीय जल सक्ति अउ स्वच्छता मंत्री चंद्रकांत रघुनाथ पाटिल काली अट्ठाईस सितंबर के राजनांदगांव जिला म पर्यावरण संरक्षण ल लेके करे जात काम ल देखे बर आवत हे। मुख्यमंत्री विष्णुदेव साय, विधानसभा अध्यक्ष डॉक्टर रमन सिंह, सांसद संतोष पाण्डेय अउ उप मुख्यमंत्री विजय शर्मा संग ओमन गांव बरगा म स्वच्छता ही सेवा अभियान म जिला स्तरीय कारीकरम म संघरही। ए दौरान आने-आने विकास

काम के भूमिपूजन अउ सिलान्यास के संगेसंग हितग्राही मन ल सामग्री बांटे जाही। ओखर बाद केंद्रीय मंत्री डोंगरगांव ब्लाक के अमलीडीह अउ अर्जुनी जाके कचरा अउ प्लास्टिक प्रबंधन बर करे जात काम के जांच करही।

खबर के मुताबिक डोंगरगांव ब्लाक तीर अर्जुनी म स्व-सहायता समूह के माईलोगन ठोस अपसिष्ट प्रबंधन इकाई चलात हे। उहें, अमलीडीह म प्रशासन ह प्लास्टिक वेस्ट मैनेजमेंट यूनिट के स्थापना करे हे।

राजनांदगांव जिला के बियालिस ठिन गांव के एक सौ ग्यारा पहाड़ी म जल संरक्षण करे खातिर सवा दू लाख गड्ढा करे गेहे। तरिया बनाय के काम कराय गेहे। ए गांव के पंचायत ह जल रक्षा खातिर एक करोड़ सोलह लाख रूपिया खरच करे हे, संगेसंग श्रमदान घलो करत हे।

वित्त विभाग-भर्ती

छत्तीसगढ़ म करीबन आठ ठिन विभाग म तीन हजार चार सौ चौहत्तर पद के भर्ती बर वित्त विभाग ह अपन मंजूरी दे देहे। मुख्यमंत्री विष्णुदेव साय के निरदेस के मुताबिक वित्त विभाग ले मंजूरी मिले के बाद स्वास्थ्य विभाग, लोक स्वास्थ्य यांत्रिकी विभाग, कृषि, ग्रामीण आजीविका मिसन, गृह विभाग, विधि विभाग, आदिम जाति कल्याण, वन अउ पर्यावरण विभाग अपन-अपन विभाग म भर्ती काम ल पूरा करे बर जूट गेहे।

खबर के मुताबिक पुलिस विभाग समेत आने सरकारी भर्ती म युवा मन बर तय अधिकतम आयु सीमा म पांच बछर के छूट के लाभ घलो युवा मन ल मिलत हे।

मुख्यमंत्री-राजस्व बैठक

मुख्यमंत्री विष्णुदेव साय ह आज निवास कार्यालय म राजस्व विभाग के समीक्षा बइठका करीन। बइठका म ओमन राजस्व अमला के व्यवस्था ल दूरुस्त करे के बात किहीन।

मुख्यमंत्री ह किहीन कि फौती नामांतरण, बंटवारा, अविवादित नामांतरण समेत राजस्व मामला के निराकरण म तेजी लाय जाय।

मुख्यमंत्री-खेल विभाग समीक्षा

मुख्यमंत्री विष्णुदेव साय ह खेल अउ युवा कल्याण विभाग के कामकाज के समीक्षा बइठका लीन। मुख्यमंत्री ह प्रदेस म खेलो इंडिया सेंटर ल चलाय के जानकारी लीन अउ अधिकारी मन ल एखर सरलग जांच करे बर किहीन। ओमन एनटीपीसी के मदद ले जशपुर जिला के सन्ना म तियार होवइया नेशनल आर्चरी अकादमी के संबंध म बतात किहीन कि ए पहल ले पहाड़ी कोरवा जउन मुख्य रूप ले तीरंदाज होथे। ओमन ल अपन प्रतिभा देखाय के मउका मिलही।

मुख्यमंत्री ह नियद नेल्लानार योजना म नक्सल प्रभावित क्षेत्र म खेल सुविधा बढ़ाय बर बने ढंग ले काम करे के निरदेस दीन।

उपमुख्यमंत्री-समीक्षा बैठक

उपमुख्यमंत्री अउ नगरीय प्रशासन मंत्री अरुण साव ह मंत्रालय म बइठका विभागीय अधिकारी मन संग राज्य के सबो नगर-निगम अउ नगर पालिका के काम के समीक्षा करीन। ओमन बइठका म सबो

आयुक्त अउ मुख्य नगर पालिका अधिकारी मन ल सहर के विकास अउ जन सुविधा विकसित करे बर काम करे के निरदेस दीन। ओमन किहीन कि कोनो भी नगरीय निकाय म काम म कोताही बर्दास्त नइ करे जाही।

भाजपा अध्यक्ष—सदस्यता अभियान

केंद्रीय स्वास्थ्य मंत्री अउ भाजपा के राष्ट्रीय अध्यक्ष जेपी नड्डा ह प्रदेस कार्यालय म सदस्यता अभियान के समीक्षा करीन। ओमन किहीन कि प्रधानमंत्री नरेंद्र मोदी ह राष्ट्र ले संगठन म जुड़े के अपील करीन हे। हम सबो झन ल प्रधानमंत्री के सूत्र वाक्य ल अंतिम मनखे तक ले जाय के जरूरत हवय। देसभर के संग छत्तीसगढ़ म भाजपा के सदस्य बनइया मनके संख्या सरलगत बाढ़त हे। हम अपन लक्ष्य ल पूरा कर लेबो। बइठका म मुख्यमंत्री विष्णुदेव साय, प्रदेस प्रभारी नितिन नबीन समेत जम्मो प्रभारी, सांसद मौजूद रिहीन।

एखर पहिली केंद्रीय स्वास्थ्य अउ परिवार कल्याण मंत्री जगत प्रकाश नड्डा रईपुर दौरा के बेरा काली संझा मुख्यमंत्री विष्णुदेव साय अउ वित्त मंत्री ओपी चौधरी संग नालंदा परिसर पहुंचिन। उंहा पहुंच के ओमन लाइब्रेरी म आने—आने प्रतियोगी परीक्षा के तियारी करत युवा मन ले गोठबात करीन।

कांग्रेस—न्याय यात्रा

प्रदेस कांग्रेस के न्याय यात्रा आज बलौदाबाजार जिला के गिरौदपुरी धाम ले सुरु हगे हे। यात्रा म प्रदेस अध्यक्ष दीपक बैज समेत बड़ संख्या म पार्टी कार्यकर्ता सामिल होइन। यात्रा म निकले के पहिली श्री बैज शिवरीनारायण मंदिर म पूजा—पाठ करीन अउ सोनाखान म सहीद वीरनारायण सिंह के स्मारक म फूल माला चढ़ाइन। यात्रा के सुरुआत म श्री बैज ह नेता प्रतिपक्ष डॉक्टर चरणदास महंत, पूर्व उप मुख्यमंत्री टी. एस.सिंहदेव समेत मोहन मरकाम अउ फूलोदेवी नेताम रिहीन।

खबर के मुताबिक प्रदेश कांग्रेस कोति ले बिगड़त कानून व्यवस्था के आरोप लगात ए पद यात्रा निकाले जात हे, जेखर समापन दू अक्टूबर के रईपुर म होही।

बातों-बातों में

सुनइया मन ल बतादन कि प्रादेशिक समाचार एकांश डहार ले समसामयिक विषय म आधारित साप्ताहिक कार्यक्रम “बातों-बातों-में” म ए बखत स्वच्छता ही सेवा अभियान म बिसेस कारीकरम परसारित करे जाही। ए कारीकरम आकाशवाणी केन्द्र रायपुर ले काली अट्ठाईस सितंबर के बिहनिया साढ़े दस बजे ले परसारित होही। एला छत्तीसगढ़ स्थित आकाशवाणी के जम्मो केन्द्र रिले करही।

आयुष्मान भारत योजना-विशेष कार्यक्रम

आयुष्मान भारत प्रधानमंत्री जन-आरोग्य योजना के छै बछर पूरा होय म आकाशवाणी रईपुर ले काली अट्ठाईस सितंबर के संज्ञा सात बजे बिसेस कारीकरम के प्रसारण करे जाही। ए कारीकरम के निर्माण प्रादेशिक समाचार एकांश ह करे हे।
